

Powšitkowne WOZJEWJENJA

njedźelu, 25. decembra 2016

Koparski turněr wo pokal TCM

Towarstwo Cyrila a Metoda z.t. (TCM) zarjaduje sobotu, 7. januara, w 14.00 hodź. w Chróšćanskej „Jednoće“ halowy koparski turněr wo pokal TCM. Přeprošene su wosadne a wjesne mustwa młodžiny kaž tež mustwa sportowych jednotkow. Kóžde mustwo měło z wosom hrajerjemi nastupić. Hrać budže so z třomi koparjemi a wrotarjom. Přizjewić měli so mustwa hač do pjatka, 30. decembra, pola Guida Zahrodnika, telefonowe čisło (01 51) 52 22 17 59.

Hodowny nyšpor w Róžeńće

Chór Lipa wuhotuje pjatk, 30. hodownika, we 18 hodź. w Róžeńčanskej cyrkwi swój tradicionelny beneficy nyšpor. Na nim zaklinča hodowne spěwy serbskich, českich a druhich komponistow. Zběrka při durjach budže lětsa za cistercienski klóšter w českim Oseku. Wšitcy lubowarjo hodownych zynkow su lubje witani. Po koncerće předawa so CD „Serbski rekwiem“ Korle Awgusta Kocora, kotraž je wuslědk nahrawanja koncertow chóra Lipy, solistow a Drježdžanskeho orchestra Sinfonietta pod nawodom Judith Kubicec lětsa w oktobru w Chróšćicach.

Hodowny koncert w Radworju

Swoj lětuši hodowny koncert wuhotuje chór Meja pjatk, 30. decembra, w 19 hodź. w Radworskim hosćencu „Meja“. Jako hosći su sej Mejenjo džiwadźelnika Měrka Brankačka a „Jolka“-džěci z Nuknicy přeprošyli. Lětuši program je nimale ryzy hodowny. Zdobom chcedža Mejenjo w nim tež na swojeho dołholětneho dirigenta Achima Brankačka spominać, kotryž by lětsa swoje 90. narodniny swjećił. Koncertej přizamknu so reje z kapału Con-takt. Wšitcy su wutrobnje do Radworja přeprošeni.

Silwester hudźbny nyšpor w Baćonju

W radosći Božej damy lětu 2016 wuklinčec z hudźbnym nyšporom sobotu, 31. hodownika, w 19 hodź. w našej cyrkwi Jězusoweje wutroby. Wo muzikaliske wuhotowanje postara so swójba Klemensa Čórliha z Kulowa pod nawodom syna Lukasa. Wutrobnje přeprošuje Baćońska wosadna rada.

Hodowny koncert w Chróšćicach

Tradicionelny hodowny koncert Chróšćanskeho cyrkwinskeho chóra z instrumentalistami a solistami wotměje so njedźelu, 8. januara, w 14 hodź. w tamnišej wosadneje cyrkwi. Zaklinči mjez druhim „Missa pastorale“ wot Wolfganga Amadeusa Mozarta. Wšitcy su wutrobnje do Chróšćic přeprošeni.

Mandželske seminary 2017

Termíny mandželskich seminarow za přichodne lěto su 3./4. februara w Kulowje, 10./11. měrca w Pančicach-Kukowje kaž tež 31. měrca / 1. apryla a 1./2. decembra w Domje biskopa Bena w Smochćicach. Přizjewić měli so zajimcy pisomnje pola Dekanatneho dušepastyrstwa, Młynski puć 4, we 01920 Worklecach abo pod e-mailowej adresu don.boskowy-dom@t-online.de. Formulary k tomu móža sej w cyrkwjach sobu wzać.

TCM – „Łužica pomha“ prosy wo dary za džěcacy hospicny wotrjad

Towarstwo Cyrila a Metoda z.t. (TCM) chce ze swojej lětušej pomocnej akciju „Łužica pomha“ hospicny dom we Vilnjusu w Litawskej podpěrać, w kotrymž ma so wotrjad za na smjerc chore džěci zarjadować. Dom bu před lětami z klósterskeje ruiny natwarjeny. W Serbach derje znaty farar Hans-Friedrich Fischer, kotryž wosebje w lětnich mėsacach w serbskich wosadach mėsnikow zastupuje, so sobu wo financowanje hospicneho twara stara.

Džensa džěla w tutej hladarni 29 přistajenych (lěkarjo, hladarjo, domowy personal a zarjadnistwo), kotrychž wjace hač 30 ludži čestnohamtsce podpěra. W tutym hospicu – jeničkim po cyłej Litawskej – je tuchwilu 14 małych bydlenčkow za ludži, kotřiž su na raka schorjeli, a jich přiwuznych zarjadowanych. Před něšto mėsacami stej uniwersitna chorownja we Vilnjusu a Zwjazk katolskich žonow nawodnistwo hospica prosyłoj, zo by dom wo wotrjad za džesać na smjerc chorych džěci rozšěriło. Twarske kóšty za to wučinjeja něhdže milion eurow. Tuž prosy TCM wěriwych wo šćedriwe dary na konto Cyrill-Methodius-Verein e.V. IBAN DE 65 750 90 300 000 828 23 66, pod hesłom „Hospicny dom“. Štóz přeje sej darowanju kwitowanku, njech poda na přepokazance swoju dospołnu adresu.

J. Špitank, předsyda TCM

Pytaja hojenskeju hladarjow a kublarjow

Marije Marćiny dom w Pančicach-Kukowje pyta wot hnydom dweju sobudžělaćerjow z kwalifikaciju hojenskeho hladarja a kublarja (Heilerziehungspfleger). Jedne městno je wobmjezowane na 30 hodžin wob tydžeń, druhe na 20 hodžin. Džěłowy čas je w dwěmaj změnomaj. Wobě džěłowej městnje matej so jako zastupowanje w samodruhosći / maćerskim dowolu wobsadzić z opciju na krute přistajenje. Nadrobniše informacije dóstanu zajimcy pola nawodnicy domu Andreje Fiedler, telefonowe čisło (03 57 96) 9 94 91 abo 9 94 92. Swoje pisomne požadanje pak njech pósćelu na adresu Klóšter Marijina hwězda, Marije Marćiny dom, Čišinskeho 35 e, 01920 Pančicy-Kukow abo z mailku na mmh@st-marienstern.de.